

Carnaval 70


Sigur un dia tristo pa mundo di Carnaval na Aruba, ora cu Diabierna merdia a bira conoci cu e gran carnavalista, Hubert C. Naar, mihor conoci como Juby y e creador di e columna 'Popo', a fayece despues di un enfermedad corto.

Juby mes a yega di conta, cu su columna di Popo na comienso a djis como un sorto di chasco pa asina pone lectornan haya humor y hari durante temporada di Carnaval. E number "Popo" ta uno cu bo por liga cu un payaso, y pesey el a usa e number ey.

Sinembargo ora cu temponan a cuminsa pasa, el a cuminsa haci Popo un formato yena cu informacion, pues no ta djis algo di haci pret mas. Cosnan pret e.o. por corda ainda cu semper ora Popo papia di Lago Sport Park, intencionalmente e ta skirbi "Lago Spat Pork". Esey tabata algun di e humor di e tempo aya.

Pero tabata valioso su informacion riba e realidad di Carnaval, e historia di con esaki a cuminsa, y tur detaye balioso rond di steelpan, e prome competencia di brassband, y su trabao valioso como Maestro di Ceremonia na eventonan di Calypso & Roadmarch Contest y mas.

Na su famia, su yiu



homer Neomar, su nieta stima, y tur amigo y colega, DIARIO ta manda palabra di condolencia.


Awenochi tin Fakkel

Corda bon cu awenochi tin Parada di Flambeau na Oranjestad. Corda cu tanto Polis y DOW lo bay cera e ruta di trempa, y a nota cu Ministerio Publico a indica cu nan a duna permiso

pa autoridad por rista tur hende den e zona.

Fuera di esey, "Faya Bo Haya" tambe a wordo incorpora den esaki, pues si unavez bo no duna oido na cualkier ordo di Polis, y ta actuando sin respet, fuera di control, sea paden of pafu di Parada, cu nan lo garabo y hibabo cera.

Si bo kier sali, percura pa bo tin placa riba bo Debit



ARUBA Programa Carnaval 70

Diasabra 6 Januari 2024

Parada di Flambeau (Fakkel)

Diadomingo 7 Januari 2024

Eleccion Prins y Pancho

Diaranson 10 Januari 2024

Inscripcion Festival di Tumba

Diabierna 12 Januari 2024

Tumberito, Calypso, Roadmarch Infant/Hubenil

Diasabra 13 Januari 2024

Eleccion Reina Infantil y Hubenil

Diadomingo 14 Januari 2024

Eleccion Reina Grandi y Señora Carnaval

Diabierna 19 Januari 2024

Evento di Jump-In

Diasabra 20 Januari 2024

Festival di Tumba #52

Diadomingo 21 Januari 2024

Parada di Fantasia

Diaranson 24 Januari 2024

Caya Paden di Champagne Carnival Group

Diabierna 26 Januari 2024

Caiso & Soca Monarch Event

Diasabra 27 Januari 2024

Parada di Mucha na Noord

Diasabra 27 Januari 2024

Caiso & Soca Monarch Finals

Diadomingo 28 Januari 2024

Parada Grandi di Mucha na Oranjestad

Diaranson 31 Januari 2024

North International Sunset Parade

Card pa asina bo paga pa por sali bek. Faya bo Haya tey pa asina percura cu tur hende lo pasa un temporada di Carnaval save, y sigur.

E topico di OPC Carnaval

Awe DIARIO kier a elabora riba e tema di OPC Carnaval Group pa e Paradan Grandi. Nan tema ta uno colorido cu ta carga e

number 'Cuba in Aruba'.


E diseño di e trahenan ta usa colornan di e bandera di Aruba y di Cuba, den un atmosfera Caribense y Tropical cu ta bay hala atencion di tur hende. Disfranzan ta trendy, hopi chic, y sigur placentero pa wowo y sigur agradable pa dal un parada largo cune.

Goza di e temporada di Carnaval 70 sin problema.



Hubert Naar: 1943 - 2024

Juby Naar como gran historiado, baluarte, periodista, y sostenedor fuerte di Teatro, Cultura y Carnaval a fayece



ORANJESTAD (AAN): Un baluarte, periodista, locutor, maestro di ceremonia, historiado, gran culturista, y conoci pa tur hende como 'Enciclopedia Bibo di Carnaval', a fayece cu 80 aña di edad.

Hubert Cornelis Naar, ta conoci pa tur hende como 'Juby'. Den forma chistoso tin hende ta yame 'Chuchubi', otro ta yame 'Cornelis', y tin tambe ta yame como 'Hucona', y por recorda su famoso columna 'Baul di Hucona', y bo ta realisa cu Hucona simplemente ta e prome dos letter di su nombenan y fam.

E tabata conoci tambe como 'Popo', danki na su columna di tur dia den DIARIO unda e tabata suministra informacion den temporada di Carnaval. Na Radio Carina FM e tabata e mastermind tambe tras di e show 'Popito', cu ta algo similar den formato cu Popo pero mas cortico pa pasa na e emisora durante Carnaval.

Juby Naar a nace na Socotoro, y despues a muda y biba na Lago Heights, y henter su infancia a pasa cynan y pesey a conoce e berdero comienso di Carnaval den siglo pasa. Ultimo decadan e tabata biba na Dominicanessenstraat na Playa.

Na comienso di su bida, e tabata un top-sportist! El a domina hopi deporte, e.o. Basketball, Baseball, Futbol, y a hasta forma parti di Delegacion di Antiyas cu a bay competi pa un Competencia Internacional cu a ser teni na Cuba. Esey ta net despues cu Cuba a bira comunista. Sinembargo como cu Hulanda ta un di e poco paisnan cu no a kibra relacion cu Cuba, esey a nifica cu Cuba a duna e delegacion di Antiyas un trato di VIP, cu semper Juby a keda corda. Mientras delegacion y atletanan di tur otro pais tabata come pan cu beleg mainta, e delegacion di Antiyas tabata ricibi cuminda completo mainta di webo, bacon, pan tosta, y mas.

Pesey mes, Juby Naar tabata gusta traha relato di tur evento deportivo. Su habilidad di capta cosnan durante un wegata fenomenal, y e ta corda tur esey pa ora e traha su relato.

Su historia cu media

Juby a cuminsa bende e corant semanal 'The Lo-

cal' tempo e tabatin 11 aña di edad. E tabata aparece tur Diabierna na San Nicolas, y na idioma ingles.

E tabata skirbi articulonnan tambe despues durante cu e ta bay scol, y esaki tabata sali den corant 'The News', tambe na ingles.

Tempo cu e emisora "Radio Antillana" a cuminsa transmiti na frecuencia di 1270 kHz AM for di nan studio cu tabata situa net patras di Lago Heights Club. Durante e tempo di prueba di transmision, Juby Naar tur atardi tabata bay pa cende e transmisor ('zender'), pa asina e emisora cuminsa transmiti. Y anochi 11:00 pm e tabata bay pa paga e transmisor ora cu e programacion a finalisa.

Ora cu e emisora a inaugura oficialmente, Juby a bira un persona cu a bira locutor na Radio Antillana. Durante esey, el a logra haya un beca di Gobierno pa bay studia na Hulanda.

Na Hulanda el a bay na Radio Nederland, y tambe na Nederland Televisie Stichting y aya a studia tur cos di radio y television. A studia tur cos tambe di Film Regie, transmision di evento bibo, produccion, traha script, balansa di sonido, y tur aspecto di traha cu actornan, bo team di produccion, y hasta con pa tin un presupuesto pa evento.

Despues di Hulanda, na Aruba e.o. el a traha na emisora Voz di Aruba riba 1320 kHz AM, tambe a traha pa RVD di Gobierno (Regering Voorlichtings Dienst), y fuera di esey a traha tambe pa Telearuba, unda e tabata locutor, y presentador di noticia.

Den decada di 1970, el a traha tambe pa e corant 'Promé' cu tabatin su sede na Savaneta. El a cuminsa labora na DIARIO, na 1980 unda e tabata un persona cu semper ta yuda demas periodista- y redactornan riba e importancia di skirbi Papiamento na forma



corecto, y semper basando su mes riba e publicacion y reglanan di Papiamento aproba na 1976.

Na 1986 el a bay yuda startup e publicacion nobo di "Matutino Corant". Na 1988 el a yuda startup cu Aruba su prome corant di atardi "Meridiano". Na 1990 el a regresa pa reforza redaccion bek di DIARIO.

En total, Juby Naar tabata den periodismo na Aruba pa mas di 50 aña.

Publicacionnan


Juby Naar tin par di publicacion riba su nomber, como cu e ta un persona cu ta gusta lesa y skirbi bastante. No ta un secreto cu el a cay cera y a keda encarcela par di aña. Den prison el a keda encarga cu Biblioteca, y esey tabata algo cu el a gusta masha hopi mes. Fuera el a siña domina par di habilidad fenomenal, pues e por a fura stul di cas, asiento di auto, e tabata cose y traha headpiece, y tambe traha

bela pa boto, etc.

Ademas di esey, e tabata encanta skirbi libreto cu storianan pa asina inclui nan den obranan teatral, y tambe asina den decada di 1980 a fortalece su grupo yama 'Cabaret Picante', cu a yena salanan yen den Cas di Cultura. E tabata crea humor net ora cu comunidad tabatin mas mester di dje. Ainda por corda con Aruba den situacion precario na ciere di Refineria Lago, toch a acudi na su obra di comedia, pa asina mira con riba escenario un dama (Mena Dijkhoff-Erasmus, d.f.m.) ta sinta yora na un entierro dilanti un caha di morto. Ora cu a yega momento di bay cu e caha, nan a hisa esaki.. y e ora ey hendenan a mira cu e caha no tin bom, y na su lugar tin un maquette realistico di Refineria Lago. Pues tabata entiero di Lago e momento ey.

Sigui lesa pag. 13

Continuacion pagina. 12



Su involucrimiento den Teatro tabata grandi, y tabata sinta combersa cu oranan largo cu expertonan den e tereno aki. Su pasatempo preferi tabata Mascaruba, unda cu por a discuti y papia riba trendnan di teatro, na un nivel mas halto cu djis crea algo di comedia. Y ora di ta presenta riba escenario, Juby tabata bay tin biaha e 'extra mile' pa haci hasta actonan fisico sin sa si acaso e lo finalisa anochi cu pia of braza kibra, pero tanten cu a entretene publico.

El a skirbi varios buki, y a haci hopi research e.o. riba origen di Carnaval, a skirbi hopi di tur e gruponan di Steelband cu tabatin na Aruba.

Enciclopedia di Carnaval

E ta wordo considera door di hopi hende como un berdadero Enciclopedia di Carnaval. Pesey mes Juby Naar ta e persona cu mas tabata wordo busca door di Scolnan, pa e bay duna lectura encuanto cierto aspecto di Carnaval. El a crea pa DIARIO, e famoso "Popo" cu a bira e columna hopi gusta di Carnaval. El a haci esey na comienso como un chansa, cu intencion di suministra humor di tur dia pa lectornan.

Pero el a desaroya y tuma un paso diferente, y a bira un fuente informativo di Carnaval cu tur detaye di e temporada. Tin biaha Popo tabata asina largo, cu e columna ta cubri 3 te hasta 5 pagina.

Como cu e tabata wordo considera e persona cu wowo critico pa Carnaval, pa hopi aña durante SAC y cu Milo Croes (d.f.m.) como lider, a duna Juby e tarea pa fungi como Presidente di Hurado pa e Paradan Grandi di Carnaval di Playa y San Nicolas. E tabata encarga pa busca miembronan di hurado, duna nan un curso relampago con pa observa tur carosa, roadpiece, bodypiece, y cumplimento di musica, y asina tabata yuda e cuerpo di hurado bira mas fuerte riba caya.

Juby Naar tabata maestro di ceremonia pa mas di 60 aña pa actividadnan rond di e isla, y no djis pa Carnaval. E tabata anfitrión pa evento di 'Bon Bini Festival' tur Diamars anochi na Fort Zoutman pa turistanan. Tambe e tabata maestro di ceremonia pa Festivalnan di Calypso & Roadmarch, y tambe Tumba Contest pa 30 aña.

Juby Naar tabata miembro activo tambe di e Federacion Europeo di Carnaval, esta FECC, y tabata viaha pa e paisnan Europeo pa cumbrenan cu ta ser teni pa cu topico di Carnaval.

Pelicula di 'Betico'

Un di su gran deseonan semper, y cu el a traha parcialmente riba e script tambe, ta pa un dia bin cu un major motion picture, pues un pelicula completo basa riba bida y logro di Betico Croes, y su plan tabata pa simplemente yama e pelicula 'Betico'. Esaki



tabata na final di decada di 1980 y comienso di 1990, y e tempo aya caba e financiamiento pa traha un pelicula asina, e tempo aya full riba film, tabata costoso y un dineral, y no tabata por a haya sponsor ni financiamiento pe.

Su analisis di pelicula of programan di TV tabata algo espectacular pa sinta y scucha di dje. Danki na su background di estudio, e tabata keda disgusta ora di mira directornan di programan di TV durante show, diripiente ta hinca un imagen cu ta wordo considera un "klapbeeld", pues un imagen di 'reverse angle'. Antes e tabata algo cu ta ponebo perde punto ora di haci estudio pa produccion di TV. Si e persona riba pantaya constantemente ta mirando direccion pa su man drechi, y inespera bo ta pone imagen di e persona mirando man robes, tabata inaceptable antes. Awor e trend nobo ta kico cu ta bo por pone riba pantaya.

Juby Naar a fayece, sin cu hamas su soño di e pelicula 'Betico' a bira realidad.

Su famoso Kashaka

Sin duda alguno, publico a mire na diferente ocasion ta cana bisti cu su 'Kashaka', cu el a laga "patenta"



na su estilo cu un diseño di 1885, y a pone riba nan varios dibuho tipico di Aruba. Algo admirable y cu sigur a pone hendenan reconoce Juby ya for di 1 kilometer leu.

Juby a fayece, lagando hopi trabao ainda cu e tabatin den 'pipeline' pa saca nan publicacion un dia. Sinembargo e obstaculonan cu el a topa pa saca e bukinan ey, tabata e moti-

bo cu tin biaha e tabata djis rindi su mes y na final di dia e bukinan ey a keda sin wordo publica.

Juby a fayece despues di un enfermedad breve y su experticio lo bay haya falta di dje. DIARIO na nomber di Famia Mansur, ta manda palabranan di profundo condolencia na henter su famia. Cu Todopoderoso tuma Juby den su Reino pa paz eterno.